

Bidestveanîna mafên neteweyî
yên gelê Kurd di çarçoveya
Îranek Demokratîk û Federalî de

Hejmar: 43
15'ê July 2006
Buha: 150 Tûmen




**Li Viyanayê meş
Kurdan xwest dosya teror dijî Dr.
Qasimlo û hevalên wî derkeve rojevê**

Roja 13.07.2006'an, 17'emîn salvegera terora dijî Dr. Qasimlo û hevalên wî bû. Kurdan li hember biroya Serok Wezîrê Otrîşê meşeke berfireh û mezin pêk anîn û xwestin dosya teror a dijî Dr. Qasimlo û hevalên wî ji aliyê vê dewletê ve derkeve rojevê.....
Rûpela 6

Rojnameya panzdehrojî ya siyasî, çandî û giştî

Partiya Demokrat ya Kurdistanê Îranê diwêşîne

**Qasimlo Bîrmendeke
Şoreşvan û Aştîxwaz**



Siyasî R. 4-6

**Deqa Axavtina Birêz Mistefa
Mewlûdî, Endamê Deftera
Siyasî Ya PDK Îranê Di Rê
û Resma 17'emîn Salvegera
Şehîdbûna Dr. Qasimlo û
Hevalên Wî de**



Siyasî R. 2

TÊGÎHÊN FELSEFÎ



Çand R. 10

Kurdan Di 17'emîn Salvegera Şehîdkirina Dr. Qasimlo û Hevalên Wî De

TEROR û TERORÎSTPERWERIYA DEWLETA ÎRANÊ ŞERMEZAR KIRIN

Ji bo nîşandana nerazîbûnê û şermazarkirina terora dewletî ya rejîma Îslamî a Îranê û yek ji wan terora hov û nemirovane ya Dr. Qasimlo û hevalên wî li ser maseya gotûbêjê di 13.07.1989'an de, xebat û çalakîyên şermazarkirinê li bajarên Kurdistanê Îranê û derveyî welat bi xurtî meşîyan. Li piraniya bajarên Kurdistanê gel ji daxwaza PDK Îranê ji bo xuyakirina nerazîbûnê û şermazarkirina terora dijî Dr. Qasimlo û hevalên wî ji aliyê dewleta Îslamî a Îranê xwedî derketin. Li piraniya bajarên mezin yên Ewropa û Waşîngtonê meş û xebatên şermazarkirinê li hember Balyozxaneyên rejîma Îranê û Parlemanên welatên Ewropayê hatin lidarxistin.

Siyasî R. 6



Wêne - Mehabad: Daxistina tev dikan û bazarên bajar di 17'emîn salvegera şehîdkirina rêberê nemir Dr. Qasimlo û hevalên wî
Wêneyên pêtir li ser malpera me bibînin

17'emîn Salvegera Terora Dijî Dr. Qasimlo û Hevalên Wî Li Binkeya Deftera Siyasî Hate Bibîranîn

Roja pêncşem, 22.04.1385 (13.07.2006)'an, 17'emîn salvegera terora dijî şehîdê mezin Dr. Qasimloyê nemir û hevrêyên wî, rê û resmeke hêja û berfireh bi beşdarbûna tev endamên rêberî, Kadro û Pêşmerge yên PDK Îranê li binkeya Deftera Siyasî a vê partiyê birêve çû.

Rê û resmê bi xwendina marşa niştîmanî a "Ey Reqîb"ê dest pê kir û piştê kurte filmek ku ji aliyê Beşa film ve li ser kesayetiya siyasî a Dr. Qasimlo û bîr û hizra hin kesayetiyan siyasî û wêjeyî ên Kurd li ser wî rêberê mezin, hatibû amade kirin, pêşkêş beşdaran bû.

Di parek din a rê û resmê de birêz Mistefa Mewlûdî, Endamê Deftera Siyasî a PDK Îranê gotarek li ser raman û kesayetiya Dr. Qasimlo pêşkêş kir û di gotara xwe de jî rêz ji bîranîna birêz Seyîd Selam Ezizî yê nemir, endamê pêşîn ê Deftera Siyasî a PDK Îranê girtibû.

Li doma rê û resma han de bi awayê kors du sirûd ji



aliyê koma hunerî a PDK Îranê û miqamek ji aliyê birêz Bêhruz Lutfi ve, bi hinceta ji destdayîna rêberê mezin û zana yê Kurd Dr. Qasimlo hatin pêşkêş kirin û her di vê derheqê de ji helbestvanan: Şerîf Felah, Cemal Necarî û xatûna Trûske, hestên bi kul û keser ên xwe di çend parçe helbestan de anîn ziman.

Di dawîya rê û resmê de ji aliyê koma hunerî bi awayê kors sirûdek hat pêşkêş kirin.

**Jin Di Yekemîn
Ceribîna
Hilbijartina
Kuweytê De**

R. 7



**Serdemê
Bav
Serdestiyê**

R. 8



**"ŞÎROVEYA
DÎWANA
MELAYÊ CIZÎRÎ"
DERKET**

R. 11



Deqa Axavtina Birêz Mistefa Mewlûdî, Endamê Deftera Siyasî Ya PDK Îranê Di Rê û Resma 17'emîn Salvegera Şehîdbûna Dr. Qaimlo û Hevalên Wî de

Hevalên xweştêvî!
Xûşk û birayên hêja!
 Ez îznê dixwazim bi nûneriya
 Deftera Siyasî ya PDK Îranê

bixêrhatina beşdarên qedirgiran yên vê rê û resma bibîranînê bikim ku ji bo rêzgirtin ji bibîranîna şehîdê nemir Dr. Ebdulrehman Qasimlo, rêberê leheng û zana yê PDK Îranê pêk hatiye.

Îro bi hinceta borîna 17 salan ji ser terora dijî rêberê leheng û payebilind yê Partiya Demokrat, dîplomat û siyasethavên navdar yê Kurd, Dr. Qasimloyê nemir û 7 saliya wexera dawî ya ne biwext ya xebatkarê sozdar yê PDK Îranê, kekê Seyîd Selam Ezîzî, endamê Deftera Siyasî ya partiya me ye ku di roja 24'ê Pûşpera 1378'ê Rojî (15.07.1999) bo cara dawiyê xatira xwe ji hevçeper, gel, welat û malbata xwe ya hêja xwest, em li dora hev civiyane. Beşdariya we di vê rê û resmê de rêzdanîna we ji bo wê rola giring û bibandor diyar dike ku her du wan ezîzan û nemaze mamostayê me yê nemir Dr. Qasimlo di berbîpêşde birina xebata gel û partiye de dilîstin.

Hevalên rêzdar!

Gelê Kurd û piraniya zaf ya xebatkarên siyasî û ronakbîr yên herêmê û gelek ji siyasethavên cîhanê ku li pey pirsên siyasî di Rojhilata Navîn de digeriyan, kêr û zêde Dr. Qasimlo naskiribûn û rolê wî mêrê mezin di guhertinên siyasî ên herêmê de fêhm kiribûn. Bi taybet em şagird û hevçeperên Dr. Qasimlo, piranî ji nêzik ve yan bi sedema bidestxistina nivîsarên wî, her kes ji me li gor xwe şarezayiya nisbî li ser rolê wî mamostayê payebilind heye. Heke em ji wêje û nivîsarên PDK Îranê re binêrin, em dibînin ku di piraniya herî zaf ya war û astan de bi dîtin, bîr û ramanên wî mirovê mezin hatiye zengînkirin û PDK Îranê û tevgera Kurd bi giştî sûd û feydeyeke zaf ji bîr, fikr û ramanên wî rêberê payebilind wergirtiye.

Di heyamê wan 17 salan de ku mixabin bi cendek di nava me de nemaye, di salvegera ji dayikbûn yan şehîdbûna wî de û bi bone û hincetên cuda cuda ve, me gelek li ser jiyana siyasî û çawanîya tevîbûn bi xebata siyasî û xwendin û rolê wî di rêberîkirina PDK Îranê de axiviye û nivîsandîye.

Li vir em çiqas li ser wî binivîsîn, nikarin ji vê çendê pêtir bibêjin ku hetanî niha li ser de hatiye gotin û nivîsandin. Aliyê kêr eva ku ne di şîyan û karîna min de ye ez tiştek pêtir bixim ser basa dîroka teji ji tekoşin û serfirazî û serbilindiyên wî rêberê mezin yê zana û siyasî.

Lewre ez rêyê dixwazim ku tenê min lênihêrîneke dubare bi ser wan tiştan de

hebe ku heya niha li ser Dr. Qasimlo hatine gotin û nivîsandin û ez parek ji nêrin û ramanên wî careke din bixim ber bal û raya we ezîzan ku bûne xet û nîşan ji bo partiye û xebatkarên PDK Îranê û ew tiştên ku di serdemê niha de girîngtir û hewcehiya wan zêdetir e, heke derfet hebe em pêtir li ser wan rawestî û bidin şîrove kirin.

Siyasetvanên gelê Kurd bi giştî û nemaze endamên PDK Îranê dizanin ku Dr. Qasimlo xebata xwe ya siyasî bi endambûn di refên Yekîtiya Ciwanên Demokrat ya Kurdistanê Îranê de dest pê kiriye, ew rêxistina ku li serdemê avabûna Komara Kurdistanê hetanî niha jî mil bi milê tekoşina vê partiye xebata siyasî û senfî ya xwe domandiye û ji bo piştevanî ji siyasethên PDK Îranê hezaran ciwan perwerde û elimandine û bi dehan û sedan kes ji wan bûn bi endamê PDK Îranê û rola çeleng û baş di jordecûna tevgera Kurd û birêvebirina erk û xebatên vê partiye de hebûye.

Dr. Qasimlo piştî hîloşîna Komara Kurdistanê yek ji wan kesên bûye ku ji destpêkirina xebata nepenî ya partiye de rol hebûye û bi taybet di refa pêşîn ya wan kesên de bûye ku sala 1334 (1955)'an ji bo serbixwe kirina rêxistina Partiya Demokrat kar kiriye û xebitiye.

Rolê Dr. Qasimloyê rêber wê demê pêtir diyar û berçav dibe ku sala 1349'an ya Rojî, piştî derçûna daxuyaniya 11'ê Adara sala 1970'an ya Zayînî li pey bi fermî nasîna Otonomî bo Kurdistanê Îraqê, vedigere Îraqê. Di wî çaxî de ku mixabin Partiya Demokrat rastî gelek pirsgerêkan bûye ku bi micid li destê wan nalandiye, Duktur wekî hekim û mamostayeke jêhatî bi alîkariya xebatkarên dilsoj yên din ên partiye ji wê delîveya hêja ku wê demê derketibû holê, mifah stand û bi dunyayek ceribandî û derbazzûyiya siyasî û deryayek ji zanist û hûrbînî û radeyêkê bêwêne ji tîkiliya kesîne, siyasî û zanistî tevî kesayeti û kom û komeleyên Kurd, Îranî û biyanî hewl û cehda bêrawestan daye ji bo saxkirin û zindîkirina rêxistinên partiye.

Bi gotina wan kesên ku wî çaxî şanaziya hevxeatbûn tevî Dr. Qasimlo hebûne, Dr. Qasimlo di vê dewranê de Ronesans di nava PDK Îranê de pêk anîye û canek taze daye peykerê nîve can yê partiye û ew jî ji ber çend sedeman bû. Berî hemû tiştekê ji ber vê çendê ku kesayeti, nav û nasnav û rewşa wî ji bo hemû deste, girûp û baskên nava partiye cihê qebûlê bûye.

Piştê jî ji ber vê çendê ye ku bi hewsele û hekimane tevî hemûyan û heta bi neyarên xwe ên herî tund jî hewil daye li dora armanc û bernamêyêkê kom bibin û ji tevan girîngtir rêyêk jî ku Dr. Qasimlo xistiye ber ra û bala xebatkarên demokrat, ne tiştek bûye ji bilî wê rêbazê ku ji



destpêkê ve bi destê bihêz û xwedî şîyan yê Pêşewayê Şehîd, Qazî Mihemed nexşê wê hatibû kêşandin û rengê wê jî rijiyabû.

Di wî serdemî de hebûna Dr. Qasimlo di hemû waran de liqîneke mezin ji Partiya Demokrat re daye. Di heyameke kurt de partî bûye xwediyê rêxistin, bernamê û pêrew, rojnameya organî û ji hemûyan giringtir biryara xwe ya siyasî. Dr. Qasimlo xebatkarên Demokrat hînî gelek tiştan kirine ku niha jî çirayê rênîşan yê rêya xebata me ne.

Wekî: parastina ûşil û qeldiyên partiye, ser û berî û dîspilîn, bawerî bi xwe hebûn, bawerî bi girîngiya teşkilatî, bihadana herçiqas pêtir bi tîkiliya berfireh û zindî bi civatên xelkê re, liberçavgiyê qazancê mezin yê netewî û niştimanî û gorîkirina bidestxistiyên biçûk di rêya parastina destketinên mezin û vîca giştî de. Ji tevan girîngtir Dr. Qasimlo gelek nîrx û biha bi azadî, keramet û kesayetiya mirovan daye. Lewre digot: **"Di cîhanê de tu nemetek ji azadiyê binirxtir nine. Azadî keramet û kesayetiye dide mirov û rêyê nade bibe bi mohre. Divêt mirov ji haletê mohrebûnê bihê der, bibe kesayeti, bibe kesek zindî û çeleng ya/ê civakê."**

Bi awayekî giştî Dr. Qasimlo rêberek xwedî şîyan, şîyar, zîrek û karjêhatî bû. Ew di gelek warên jiyana siyasî û civakî de bêwêne bû, Şoreşvan û Pêşmergeyê çiya û ronakbîr û nivîskar û darêjêrê siyasethên giştî ên partiye bûye ku ji me re rênîşander bûn.

Dr. Qasimlo li hundir rêberek xelkî û popoler û li dunyaya derve dîplomatek şareza, pîspor û jêhatî bû. Gelek kesên biyanî li ser kesayetiya siyasî û karîna dîplomasiya Dr. Qasimlo nivîsandine.

Li vir em dê tenê mînakekê binin.
Canatan Rendal, rojnamevanê mezin

yê Amerîkayî, dibêje: "Qasimlo take rêberê Kurd bû ku dikarî bi lêhatîbûn û biwêrî ve tevî dewletekê bikeve gotûbêj û danûstandineke serbilindane. Şiûra siyasî û têkiliyên bi siyasetan û rojnamevanên Ewropî û yên din re wareke zanistî bi kesayetiyê Qasimlo dabû ku li tu kesayetiyê din yê/a Kurd nedabû." Piştî dibêje: **"Gelek Kurd li ser vê baweriyê ne, heke Dr. Qasimlo niha maba, dikarî karê hemû Kurdan ber bi pêş bibe".**

Hemû ev xisletane û gelek taybetmendiyên din ên Dr. Qasimlo bibûn sedema vê çendê ku Komara Îslamî, dijminê kîndar yê gelê Kurd û Partiya Demokrat, kerb û kîneke kevneperestane ya kûr ji Qasimlo hebe û hemû rêyan bo ji nav birina wî bigre pêş. Ewa bû ku mixabin ji seha aştîxwazane ya Dr. Qasimlo mifaha nebaş wergirt û bi wî awayê ku em hemû haydar in, kompoyek jê re hate darêtin û di roja 13.07.1989'an de li bajarê Viyan, paytexta Otrîşê bi destê terorîstên Komara Îslamî hate şehîd kirin.

Di rastî de rejîmê dixwast bi ji nav birina Dr. Qasimlo, PDK Îranê ji holê rake, lewra jî nîşane li serê partiyê girtibû. Lê rayedarên Îranê hesab ji bo roleke gelek bingehîn di karê rêberiya Dr. Qasimlo de nekiribû. Ew jî eva ku Duktora hergav hewil dida rolê takekesî di nava partiyê de biçûk bihê kirin û bihayê bi karê bikom û eqlê bikom û rêberiya bikom bihê dayîn. Bi taybetî ew hîzr, raman û rênîşandanan ku li paş xwe ji bo partiyê û xebatkarên Demokrat bicî hêlane, heke xwendineke dirust li ser bihê kirin û her yek ji wan di cihê xwe de mifah jê bihê standin, nek terorkirina kesayetiyê weke Dr. Qasimlo, belkî hemû pîlan û komplo dijî Partiya Qasimloyê mamosta û rêberê vala û pûç bibin.

Gelî hevalan:

Dr. Qasimlo bi gotinên xwe ên bi nîrx û şîretên mamostayane gelek xet û nîşanên dirust ji me re darêtine ku heke xebatkarên Demokrat û şagirdên Qasimlo bi başî hîn bibin û li cihê hewce jê sûd û faydeyê werbigirin - ku ez di karîna xebatkarên partiyê de dibînim - ez piştrast im ku tu demekê gelê Kurd rastî bêhêvîtiyê nabe û şagirdên Qasimlo nasekinin û bi mifah wergirtin bi ceribandî û şiyana siyasî û hîzrî ya Mamostayê xwe rêya çareseriyê tev pîrsgirêkan dê peyda bikin.

Dr. Qasimlo di gotinên xwe ên bihagiran de gelek micid tekez li ser vê çendê dikir ku heke gelek azadîxwaz be, divê nirxa vê azadiyê jî bide. Xebat dijî zîlm û zordariyê ji bo Dr. Qasimlo pîrseke bingehîn bû. Di hevpeyvinê tevî Bêhroz Yûsîfzade de dibêje: **"Pîrseke bingehîn ji bo min ku her ji destpêka ciwanîyê min jê re xebat kiriye, pîrsa ji nav birina stem û zordariyê bûye."** Baweriyê kûr û kemilî bi demokrasiyê hebûye û ji bo

cihgirkirina demokrasiyê di nava rêxistina partiyê de xebat kiriye. Di tu demekê de bihaya demokrasiyê li ber çavê wî ne kêmkirî bûye û demokrasi weke take zamin û garantiya dabînkirina maf û azadiyan hesabandiyê. Lewra gelek bi eşkere dibêje:

"Min demokrasiya herî xirab ji dîktatoriya herî baş pê çêtir e."

Gelek xurt dijî dîktatorî, raman û bîra dîktatorî û takekesperestiyê sekinî ye û derheq yekîtiya siyasî û fikrî de dibêje: "Xurtkirina yekîtiya siyasî û fikrî erkeke bingehîn e ku dikeve ser milê tev endamên partiyê. Xuya ye gişt endamên partiyê derbarê pîrsên siyasî wekî hev nafikirin, armanc jî ne eva ye ku wekî hev bifikirin. Ji ber ku eva ne mumkin e û ne jî bi qazanc û berjewendiyê tekoşîn û xebata partiyê



Dîmenek ji beşdarên rê û resma 17'emîn salvegera şehîdkirina Dr. Qasimlo û hevalên wî di binkeya Deftera Siyasi ya PDK Îranê de

ye, merem ji vê yekîtiyê ne standina afirandina fikrî ji endamên partiyê ye. Hebûna bîr û rayên cuda û li hevkirina demokratîk ya wan kîlîta çareserkirina rast ya arîşe û pîrsgirêkan e û sedema ber bi pêşde çûna partiyê ye."

Bi nêrîna Dr. Qasimlo bi giştî awayê herî baş yê rêveberiyê di partiya me de têkiliyên zindî, rênîmayî û di encam de têgihjandin e.

Dr. Qasimlo teror wekî kiriyareke biyom û dijî mirovane dizanî û teror li her cihekê û bi her merem û awayekê biba, şermezar dikir. Di rastî de Dr. Qasimlo sinc anî nava siyasî û serxwebûna biryara siyasî ji bo PDK Îranê ji hemû tişteke din zêdetir hez kiriye. Ji bo derbarkirina rêxistina partiyê ji girêdayîbûn bi rêxistinên din, gelek kar û xebat kiriye. Tu demekê delîve û fersend nedaye ku serxwebûna partiyê bikeve xeterê.

Ezîzino!

Tevî bibîranîna mamostayê me yê mezin, cihê xwe ye ku em yek ji xebatkarên sozdar yê PDK Îranê bibîr binin, ku di roja 15.07.1999'an bo cara dawiyê xatira xwe ji me xwast. Nemir kekê Seyîd Selam Ezîzî ku 7 salan berî niha di çaxeke bêwext û di rewşekê de ku partî û gelê wî ji gişt demekê pitir hewcehî pê hebû, destê ecelê ji me stand.

Kekê Selam ew mirovê xudan îman û berxweder bû ku di sala 1979'an têkilî bi Partiya Demokrat ya Kurdistanê ve girt û ji bo tekoşîna tev dem di refa PDK Îranê de dest ji hemû xweşiyên jiyanê û gişt pile û payeyeke dewletî berda û wekî Pêşmergeyekê refên PDK Îranê ji xwe re hilbijartin û bi karê berdewam û dilsojane û nîşandana jêhatîbûnê, piştî heyamekê tev pileyên rêxistinî qetandin û gihîştê pileya Komîteya Navendî û Polîtîroyê. Berpîrsiyariya dawî ya Kekê Selam Ezîzî, berpîrsiyariya Komîsyona "Siyasî - Nizamî" yê bû. Bê guman ji dest çûna wî xebatkarî ji bo tevgera Kurd û PDK Îranê xisareke mezin bû û ji bo me hevçeperên wî jî kul û xemeke giran û dilşewat.

Hevalên hêja!

Di çaxekê de em rêberê xwe yê şehîd, Dr. Qasimlo û xebatkarê emegdar yê gelê me kekê Selam Ezîzî bibîr tînin ku ji caran pitir navber yê ketiye nava xelkê Îranê û rejîma Komara Îslamî û valahî û veqetiyaneke kûr di navbera desthilat û xelkê Îranê de heye, bi curekê ku piraniya zaf ya xelkê Îranê vê rejîmê bi ya xwe nizanin û hêviya ji navçûna wê dikin û heke derfet ji wan re jî pêk were, amade ne çelengane dijî vê rejîmê xebatê bikin û bihişînin. Serbarê vê yekê ku bi sedema jordecûna bihaya nîft (petrol)ê di van du sê salên borî de Îranê pitirî 40 milyar Dolar paşketa

diravî heye, lê rewşa aborî ya welat gelek xirab e û xelkê Îranê ji destê giranî, jarî û destkurtiyê di welat de bêzar bûne û rastî dijiwariyan hatine. Kirîz û pirsgrîrêkên cuda cuda ên siyasî, civakî û çandî hene û nebûna azadî û hebûna perçiqandinê xelk bi tevahî aciz kiriye. Lewra heke em bi pîvanên demokrasiyê ji rejîma Komara Îslamî re binêrin, demak dibe ku vê rejîmê rewayî û meşrûiyeta xelkî ya xwe ji dest daye û bi darê zorê xwe bi ser xelkê de sepanîye. Em piştrast in heke derfet û fersendeke herî kêrêm hebe, xelkê Îranê dê vê sîstemê bi awayekî giştî ret û mandel bikin.

Serbarê vê çendê ku serkut û givaş bi ser xelkê Îranê gelek zaf e, lê bi vî halî jî xelk bi awayê cur bi cur di derfetên herî kêrêm û mumkin de, nerazîbûnê xuya dikin û meş û xwenîşandanan lîdar dixin. Li vir hêja ye em qala 2 nimûneyên berçav bikin ku her du di meha Pûşperê ya sala çûyî qewimîn:

Meş û serhildana şoreşgerane ya xwendekarên zanîngehên Tehranê û serhildana xwendekarên çend zanîngehên din di piştgirî ji tevgera xwendekarî di 09.07.1999'an. Ya din jî serhildana şoreşvanane ya xelkê Kurdistanê ye ku ew jî di 09.07.2005'an de ku bi şehîd bûna Şiwane Seyîd Qadirî li bajarê Mehabadê dest pê kir û piştî piraniya bajarên Kurdistanê vegirt û li her bajarekê de hetanî heyamekê didoma. Mixabin herçiqas her du liv û hereketên han ji aliyên kirêgirtiyên rejîma Melayan bi xwînê hatin verdan, lê girîngî û bihaya wan serhildana li vê çendê de ye ku ne xwendekarên zanîngehên Îranê û ne xelkê Kurdistanê netirsyan û heya ji bo bideştveanîn û dabînkirina xwastek û daxwaziyan xwe her mîkum bûn.

Di asta navneteweyî de jî rejîm rastî pirsgrîrêkên pêtir bûye, maytekirin di kar û barên dewletên Feleştîn û Îraqê de gelek ji caran eşkeretir e. Eva ji ber çavê kom û komeleyên siyasî û navneteweyî, nemaze dewletên xwedî biryar bizir nabe. Her wiha hewl û xebatên rejîmê ji bi zengînkirina Uraniyûmê û aqibet bideştixistina çeka Etomî ji ber raya dunyayê nahê veşartin. Bi kurtî em dikarin bibêjin, dewletên berpirsyar û xwedî biryar bi hev re karê micid dimeşînin, bona wê çendê ku rejîma Komara Îslamî çekên Etomî ne bideşt bixe, ew jî ziyar û zirareke zaf ji hitbara rejîmê û dîplomasiya Komara Îslamî dide.

Hevalino!

Partiya Demokrat dikare bi karê bikom, eqlê bikom, yekdilî û hev dengî û mifahwergirtin ji bîr û ramana Dr. Qasimlo ku wekî mîrateke bihagiran jê re bi cî maye, di nava xwe de valahiya Dr. Qasimlo û hevçeperên jêhatî û ji dest çûyî tijî bike û bi mifahstandin ji wan warên baş ku niha derketine rojevê û ev îmkana propagandeyê ku di dest de heye, berdewam û çalakî ji caran xebata siyasî, dîplomasî, rêxistinî û gelfî bimeşîne û pitir û çêtir ji caran di jî dijîmin raweste ku eva hem dibe sedema hêvîdarbûna xelkê Kurdistanê û hem dibe maya asûdebûna ruha bilind ya Dr. Qasimloyê mamosta, kekê Selam Ezîzî û tev şehîdên rêya azadî û bexteweriyê.

Silav ji mamostayê me yê rêber, Dr. Qasimlo di 17'hemîn bibîranîna şehîdbûna wî de.

Silav ji bo canê kekê Seyîd Selam Ezîzî, bi hinceta heftemîn bibîranîna ji dest çûna wî.

Silav ji canê paqij yê hemû şehîdên Kurdistanê û berdewamî ji bo rêya teji serbilindî a wan.

Mirin û neman ji bo kevneperestî û terorîzmê.

Qasimlo Bîrmendeke Şoreşvan û Aştîxwaz

Cemîl Kulahî

Di demekê de ku şoreşa netewî ya Kurd li Kurdistanê Îranê ji bo bideştveanîna mafê

netewî û rewa yên xwe bi sedema tepeserkirina bêrehmane ya desthilatên zal bi ser Kurdistanê de rawestiya bû û dengê mafxwaz ye vê netewa çewisandî bi awayekî ne mirovane fetisandibû, hatina Dr. Qasimlo bi nava qada xebata netewî, wekî bêhna mesîhiyayî bû ku ser li nû caneke taze li ber tevgera Kurd hate kirin, kete livînê û



careke din vejîya. Ev jî vedigere bo vê çendê ku Dr. Qasimlo demeke zaf li welatên Ewropayî mijûlê xwendin û lêkolînê bû, ji bilî vê yekê mamostayê zanîngehê bû, wekî miroveke xwendekar, akademîk û dunyadîtî ji pirsgrîrêkên cur bi cur dinêrî, bi taybet pirsên têkildar bi şoreşa Kurdî. Lewra hemû hewl û tekoşîna wî eva bû ku rêyeke çareserîya zanistî û hemdem, ji bo çareserkirina pirsgrîrêka Kurd peyda bike. Ev cure nêrîn û ramane tişteke nû bû ku wî rêberê mezin dixwast bîne bo nava şoreşa Kurdan û jê re bike bingehek. Ji ber ku bi sedema vê çendê ku tevî siyaseta cihanî û dunyaya derve û her wisa bi siyaseta hikûmetên zal bi ser Kurdistanê û herêmê de nasyarî hebû. Şarezayîyeke kemilî li ser jeopolîtîk û hilkevta demografiya Kurdistanê û giraniya siyasî ya Kurd hebû û siyaseta û rêzaniyên xwe li ser wan rastiyanê didarêt, çunkî karê siyasî li gor ramana Dr. Qasimlo, xwediyê sê xwasmaniyên sereke bû, ku hetanî wê demê di nava tevgera Kurdî de nedihatîn dîtin, lewra ji bo cihgîrkirina wan di nava bizava Kurd de cehd û hewla bêrawestiyê di da:

1. Rastdîtin di siyaseta de
2. Serxwebûna biryardanê di siyaseta de
3. Cîgîrkirina exlaq (sinc) di siyaseta de

Dr. Qasimlo hemû demekê ev yekê dubare dikir ku **siyaset hunera mumkin** e û digot ku xala jar û qels ya tevgera Kurdî eva bûye ku hetanî niha yan **hemû tiştêk** xwastiye yan **çî tiştêk**, lewra digot siyaseta ne **reş û sipî** ye, belkî di navbera reş û sipî de rengê din jî hene. Bi baweriya Dr. Qasimlo siyaseta kirin tevî hêviyan cudahiyeke kûr heye. Çunkî bi baweriya wî siyaseta pêwendî bi rastî û heqîqetên hundirîn, herêmî û cihanî ve heye û bîngeha hêviyê jî li ser xeyalê ye, ku eyan e xeyal û rastî du tiştên bi tevahî li hev cuda ne. Wî rêberê mezin di hilgirtina dirûşmên xwe de, daxwaziyan xwe de û bi giştî di siyaseta kirinê de rastiyanê hundirîn, herêmî û cihanî analîz dikir û piştî nixrandineke zanistiyane raya xwe dida xuya kirin. Hebûna ramanên wisan di siyaseta de karek kiribû ku Dr. Qasimlo dirûşmekê hilbijêre ku ne tenê jê re cî bi cî bibe, belkî tevî rastiyanê Îranê bi giştî û bi taybetî Kurdistanê de hev bigire, ji ber ku xwe di pêxema wan dirûşm û daxwaziyan de bi berpirs dizanî û digot ku em **partiyek berpirsyar** in, lewra ye divêt di hemû waran de em **berpîrsane** bilivin û tevbigirin.

Teybetmendiyêke din ku Dr. Qasimlo di kar û xebata siyasî de li ser de bîrsar bûye, **serxwebûna biryardanê di siyaseta de** bû. Ji ber ku wî jêve bû ku tu aliyeke herêmî û navneteweyî bi radeya rêber, partî û aliyan siyasî yên Kurdistanê li ser rastiyanê zal û balkişandî bi ser Kurdistanê de ne şareza ne, lewra eva ku divêt biryarê bide, rêber, partî û aliyan siyasî yên Kurd in û tu kesê heq nine û nikare bêy wan û raya wan li ser Kurdistanê biryarê bide. Yek ji wan sedema ku wî li ser serxwebûna siyasî bîrsar bûye, eva bû ku karê siyasî û siyaseta kirin ji bo çawanîya

birêvebirina welat û parastina vêc û berjewendiyên natewî ye, ku bêtir serxwebûn di biryardanê de ev du tişt cî bi cî nabin. Di şirovekirina pirtûka "Basek kurt li ser sosyalîzmê" de wiha li ser girîngiya serxwebûnê diaxive: "Em seba dostîniyê qet dest ji serxwebûna xwe û qazancê neteweya xwe ber nadin, lê li ber xetera serxwebûn û qazanca neteweya xwe heke hewce be, em dê dest ji dostîniyê berdin. Lewra pîvan ji bo me qazancê partiyê, gelê Kurd û gelên Îranê û serxwebûna me ye. Pîvana bingeîn serxwebûna biryardanê ye, em dostîniyê dikin, lê tevî parastina serxwebûnê, heke hewce bû em dostîniyê gorî serxwebûnê dikin, lê em tu demekê serxwebûnê gorî dostîniyê nakin". Her ji ber vê sedemê bû ku Dr. Qasimlo gişt demekê li ser bingeha rêz girtina du aliyan pêwendî tevî aliyan din pêk aniyê.

Taybetmendiya sêyemîn ku di siyaseta Dr. Qasimlo de diyar e û bi xwe jî baweriyêke kûr pê re hebûye **exlaq di siyaseta** de bû ye. Lewra di vî warî de diji her cure bêûsil û bêqeydê, gotinên kirêt û nexweş û fêlîyê di siyaseta de bû. Lewra di kar û xebata siyasî de bi kiryarên însanî, wêjeya gelî û popolistî û paqij baweriyêke kûr hebûye. Di vî warî de bi xwe jî dibêje: **"Em bêûsil û bêqeydê û dijûndanê di siyaseta de ret dikin û ji bo cihgirkirina sinc di siyaseta de dixebitin"**.

Bi sedema hebûna van cure nêrîn û ramanane di karê siyasî de ye ku Dr. Qasimlo ji şer re wekî taktîk dinêre, taktîk ji bo gihîştin bi aştî û tenahiye. Çunkî li ser vê baweriyê bû ku Kurd ne xwediyê wê hêzê ye ku bikare dijminê bi tevahî teyar bi çekên nûjen ji nav bibe, lewra divê Kurd şerê çekdarî wekî taktîk ji bo mandîkirina dijmin bi kar bîne, heta wê demê ku dijmin neçar bi gotûbêjê be. Gotûbêj û diyalog bi baweriyê Dr. Qasimlo wekî awayek ji şeklên xebatê dihatê dîtin, Dr. Qasimlo jêve bû her aliyekê ku bawerî bi vê yekê nebe **deriyê siyaseta** li ser xwe de girê daye. Di vî warî de, li ser girîngiya gotûbêjê dibêje: **"Di rastî de ez bona gotûbêjê şer dikim, çunkî em dibêjin pirsgrêka Kurd re çareserîya leşkerî tune ye"**. Li ser vê bingehe bûye ku hemû demekê di çaxê xebata diplomasî û têkilîkirin bi welat û aliyan din ve daxwaza piştgiriya siyasî ji doza Kurd kiriye ku eva tiştê e ku di nava şoreşa Kurdan de nû ye. Lewra Dr. Qasimlo ji bo bidestveanîna piştgiriya siyasî ji tevgera Kurd di asta cihanî de hewl û bizaveke zaf dide, bo minak têkoşîna bê nimûne ya diplomasîyê ji bo pêkanîna konferanseke navneteweyî bo çareserkirina pirsgrêka Kurd rê xistibû ku eva jî vedigere bo wê ramanê ku wî jêve bû ku divê pirsê Kurd di forma hundirîn û herêmî bihê derxistin û bibe pirsêke navnetewî. Di vî warî de digot: **"Divê em ji tev wan kesan re ku guhdariya gotinên me dikin, bibêjin ku daxwaza Kurd gelek sade û rewşa ye, Kurd mafê xwe yê netewî dixwaze ku di Carnameya Gerdûnî ya**

Mafê Mirovan de hatiye, wate tiştê ne zêde ye, lewra bo minak daxwaza Otonomiyê pirsêke ne hundirîn e. Li gelek ji welatên weke dewleta Îranê de heke basa Otonomiyê tê kirin, dibêjin ew dozeke hundirîn e û ne mafê tu kesekê ye ku dest têwerde û pêre tevbigere. Lewra pirsê Otonomiyê, ne meseleyeke hundirîn e û parek ji mafê mirovan e. Lewra jî ew dewlet, rêxistin û kesayetiyên ku xwe bi aligirê mafê mirovan dizanin, hewce ye ji daxwazên rewşa yê neteweya Kurd piştgiriya bikin." (Rojnama KURDISTAN, hejmara 187)

Ji bo gihîştin bi vê meremê, yanî cihanîkirina pirsgrêka Kurd, bi vekirina bîroya nûneriyê ji PDK Îranê re li welatên cuda cuda, têkilîkirin bi partî û aliyan siyasî yê welatên derve, lidarxistina civîn û sêminarên cur bi cur û hevpeyvîn tevî medyayên giştî li ser pirsgrêka Kurd, karî bi başî pirsgrêka Kurd bi welatên derve bide naskirin, ku encam, vêc û qazancên bihagiran yê wan awayên xebatê her zû derket û bandoreke erênî li ser pirsgrêka Kurd danî.

Dr. Qasimlo ji bo pêşdebirina vê siyaseta rast û dirust ku girtibû beriya xwe û cihgirkirina wan di nava tevgera Kurd de, di hundirê vê tevgerê de jî hewl û xebateke bêrawestan bo guhartina dida, ji ber ku vê tevgerê di hindek waran de hewcehî bi reforman hebû. Her wiha ji bo derketina rûçikê delal û xweşik ji vê tevgerê re li rex raya giştî ya derveyî welat, pêwîst bû tevgerê ji hinek kar û kiryarên ne mirovane û biyom dût be û paqij biparêze. Ji ber ku dizanî ku dunya ji tevgerekê re ku tîkel bi karê ne mirovane bibe, piştgiriya siyasî nake. Xebat diji terorîzmê, diji nasyonalîzma berçavteng, xebat ji bo cihgirkirina demokrasî û bihayên nûjen û modern di nava tevgera Kurd de, xebat diji her cure cudahîdaneke zayendî, ragezî, olî û netewî, diji her cure takekes perestiyekê û hwd... ji wan nixran bûn ku Dr. Qasimlo bêrawestiyar hewl dida ku bîne nava tevgera Kurd de.

Dr. Qasimlo hemû demekê eva dubare kiriye ku ji bo gihîştin bi armancên pîroz û rewşa, divê alava pîroz û rewşa bihê bikar anîn, çunkî li ser vê baweriyê bûye ku tevgera Kurd, bizaveke berheq e û tevgerekê ku di rêya mafên mirovî yê neteweyên bindest de serî hildaye, lewra nabe rûçikê vê tevgerê bi sedema karê terorîstî ve ku bi **alava ne pîroz** li nav dike, di nava raya giştî ya cihanê de xirab bihê kirin. Lewra her çiqas Dr. Qasimlo rêberê partiyêke çekdar bûye û şerê çekdarî meşandiye, lê hevdem tevî vê çendê reşkuştin, êxsîr kuştin, lêdan û îşkence, teror, rehîngirtin, revandina balafiran û teqandinê mehkûm û şermazar kiriye. Lewra ew şerê ku Partiya Demokrat dikir di şeklê rûyekî û

naverokê de tevî terorîzmê cudahiyeke kûr hebûye. Dr. Qasimlo derbarê wî şerî ku PDK Îranê dikir, digot: **"Nabe bîra me biçe ku Pêşmerge di pêxema bidestveanîna wan armancên gelê Kurd xebatê dike ku dijminê azadiyê ne amade bûn bi aştîyê wan qebûl bikin û ji bo perçiqandin û bînpêkirina daxwaziyan gelê Kurd êrîş kirine û şer bi ser xelkê Kurdistanê de sepandine. Lewra şerê Pêşmerge bo berevanî ji azadiyê, şer di pêxema mafêke rewşa de ye û di encam de şer ji bo gihîştin bi aştîyêke serbilindane û adilane ye"**. Eva naveroka şerekê ye ku Partiya Demokrat kiriye, lewra ye ku wî rêberê zana hesaba xelkê sivil û bê berevan ji hikûmeta serkûtker ya Melayan cuda dikir û diji pêkanîna tirsê bo ser jiyana xelkê sivil bû. Li ser vê bingehe bû ku terorîzm û tevgerên netewî ji hev cuda dikirin û di navbera wan de cudahî didanîn, digot eva du tiştên ji hev cuda ne, li ser vê yekê tekez dikir û digot: **"Terorîzm û tevgerên rizgarîxwaz yê netewî du pîrsên cuda ji hev in, di şerê çekdarane yan partîzanî de ji bo azadiya neteweyekê penabirin bo ber terorîzmê ne hewce ye. Berevajî ez bawer im tevgerên bihêz, ew tevgerên ku di rêyên demokratîk de diçin, rênûmayî tînin kirin, aligirî û piştgiriya xelkê bi wan re ye, tu hewcehiya wan ji bo penabirin bo ber terorîzmê nîne"**.

Dr. Qasimlo hetanî wî cihî çarçoveya şermazarkirina terorîzmê berfireh dike ku ew rêxistin û partiyên Kurdî jî ku stiratêjiya xwe li ser vê bingehe ava kirine, vedigere û dibêje: **"Armanca wan tevî armanca tevgera rewşa ya Kurd ne yek e"**. Çunkî cuda ji vê çendê ku tîrsa xirabûna rûçikê tevgera Kurd di nava bîr û raya giştî ya cihanê de hebûye, tîrsa vê çendê jî hebû ku hikûmetên desthilatdar bi ser Kurdistanê bona vê yekê ku bizava Kurd bêitbar bikin û hêcetê ji bo mîlîtarîzekirina Kurdistanê binîn û xwe wekî parêzerê azadî û mafê xelkê bidin xuyandin, ji kiryarên terorîstî ku ji aliyan wan girûpane diqewimin, mifaheke nebaş bistînin, lewra gişt çaxekê ev yekê ji hêzên Kurd re dubare dikir û rêniwîni dikirin.

Dr. Qasimlo cuda ji vê çendê nasyonalîzma berçavteng jî ret dikir û li ser dostîniya navbera gelan de tekez dikir û bêrawestiyar ji bo yekîtîya navbera neteweyên bindest yê Îranê hewl û cêhd dikir û bo ji hev nêzîkirin û tîkiliyên dostane di navbera wan neteweyan de dixebitî. Dr. Qasimlo li ser vê baweriyê bû ku hevalbendên stiratêjîk yê me, neteweyên bindest yê Îranê ne. Her wiha gihîştibû baweriyê ku tenê bi hev girtin û hev xebatiya neteweyên Îranê ye ku sistemeke demokratîk di Îranê de cihgir dibe. Di vî warî de dibêje:

"Tevgera gelê Kurd her çiqas bihêz jî be, aliyan zaf tenê dikare rejîmê jar û rêyê ji bo hiloşandina rejîmê xweş bike, lê tu demekê nikare bibe

altirnatîv, lewra me berdewam hewl daye ku pêwendîya navbera tevgera gelê Kurd û gelên din yê Îranê xurt bikin."

Lewra di demên dawîn yê jiyana xwe de tevî vê çendê ku berevaniyê ji mafên Kurdan dike, li ser dabînbûna mafên neteweyên din jî tekez û îsrarê dike. Bi anîna navê wan netewane, dibêje: **"Heke îro pirsgerêka wan netewan çareser nehê kirin, di pêşerojê nêzik de divê em li benda bûyerên nexweş bibin"**. Ev raman û hizre vê rastiye derdixe holê ku Dr. Qasimlo nasyonalîzma berçavteng bi tirs bo ji hev belaybûna xebata mafxwazane ya gelên bindest yê Îranê û her wisa bi rê xweşkirin ji bo pêkhatina bîra şovenîstî û mezinxwaziye zaniye, ku eva bi xwe dibe berband û astengek li ser rêya hevgirtina neteweyên Îranê û ji hev dûrketina wan. Lewra Dr. Qasimlo bo berêgirtin ji serhildana nasyonalîzma berçavteng û her cure mezinxwaziye, dixebitî ku tevgera Kurd demokratîze bike, lewra digot xebata me bi tenê ne **neteweyî** ye, belkî xebateke **neteweyî demokratîk** e. Ji ber ku Dr. Qasimlo li ser vê baweriyê bû ku mirovê/a demokrat, mirovan ji her netewe, regez û olekê bibin, ji wan re wekî hev dinêre û dixebite ku nîrxên mirovahiyê di nava civakê de pêşde bibe. Lewra derbarê girîngiya demokrasiyê di nava şoreşê de digot: **"Nabe tu demekê xebat ji bo demokrasiyê biçe bin xebat ji bo mafê neteweyî yan xebata tex û çinayetiye"**. Ev wê rastiye derdixe holê ku Dr. Qasimlo demokrasî bi kilîta çareserîya pirsgerêkan dizanî, lewra bê westiyên hewl dida ku demokrasiyê weke bingehekê bîne nava tevgera Kurd. Dr. Qasimlo bo ji holê rakirina berçaviya takekesperestiyê di nava tevgera Kurd ku jêve bû, astenga sereke ya cihgirbûna demokrasiyê di nava vê tevgerê de ye, cehdeke zaf da ku vê ramanê du vê û qazanc di şûnde hebû: 1- Negirêdana tevgerê bi takekes, 2- Perwerdekirina mirovên biwêr, netirs û çeleng. Lewra digot: **"Di cihanê de tu nemetek ji azadiyê ne binirx û pîroztir e. Azadî keramet û kesayetiye dide mirovan û rêyê nade mirov bibin bi muhre ... mirov divê ji haletê muhrê de bihê der, bibe kesayeti, bibe keseke/a zindî û çeleng yê/a civakê"**.

Ji bilî vê çendê Dr. Qasimlo bo ji navbirina her cure cudahîdananeke zayendî dijî jinan xebitiye û bo ji navbirina bînpêkirina mafê jinan hewl û bizav kiriye ku di vî warî de dibêje: **"Jin nîviya civakê ne. Her çiqas jin kêmtir di kar û barên civakê de beşdar bibin, ew qas kar, tekoşin û afirandin di civakê de kêmtir e û her ew hinde jî civak paşverûtir e. Lewra radeya beşdar bûna jinan di hemû warên jiyana civakî û siyasî de, nîşana pileya pêşketina her civakekê ye."**

Ev cure bîr kirine demokratbûn û nûjenbûna wî rêberê mezin nîşan dide ku bi anîna wan rêbazên rast û bîqêde û azin bi nava tevgera Kurd, bû sebebê vê çendê ku tevgera Kurd bikeve ser rêbazeke nûjen û hemdem. Rêbazek ku bû sebebê pêşdeçûna roj li pey rojê ya PDK Îranê wekî pêşengê tevgera Kurd li Kurdistanê Îranê. Lewra divê em bîr û rêbaza Dr. Qasimlo û rêniwîniyên wî rêberê mezin ku bang û gaziya wî pêkanîna civakekê pêka biha û nîrxên mirovî dikir, bi kiryar di nava civakê de xurt bikin, pêşde bibin û her wiha wan cihgir bikin.

Werger: Azad Kurdî

Di 17'emîn Salvegera Terora Dijî Dr. Qasimlo De, Pêlên Nerazîbûnê Tev Kurdistan Bi Xwe Ve Girt

Di tev bajar, bajarok û herêmên cur bi cur ên Rojhilata Kurdistanê de hate ragihandin ku piştî belavbûna bangewaza PDK Îranê ku tê de

daxwaz ji xelkê hatibû kirin di roja pêncşem, 22'ê pûşperê de ji bo rêzgirtin û bibîranîna Dr. Qasimlo û hevrêyê wî Ebdula Qadîrîazer, nerazîbûna xwe bi dijî rejîma terorîstperwer a Îranê bi daxistina dikan û temirandina çîrayan bo dema 3 deqîqan nîşan bidin, demjimêr 23'ê haman rojê de û di bersiva



Bajarê Mehabadê

daxwaza han de, pêlên nerazîbûnê bi dijî Komara terorîstî a Îranê ji deryaya xelkê Rojhilatê Kurdistanê bilind bûn.

Li gor agehiyên gihîştî bi me, xelkê piraniya bajar û herêmên cur bi cur yê Kurdistanê di bersiva daxwaza PDK Îranê de bi awayekê bê wêne dest avêtin daxistina dikan û bazaran û çîrayên malên xwe seet



Daxistina dikan û bazarên Mehabadê

23'ê heta 23:03 deqîqeyan temirandin. Her wiha dirûşm û belavokên PDK Îranê û wêneyên şehîd Dr. Qasimlo bi awayekî berfireh hatin belav kirin.

Çalakiyên han di wan herêmên ku di jêr de tên berçavtir bûn:

Urmiye, Selmas, Pîranşar, Nexede, Şino, Mehabad, Bokan, Bane, Serdest, Rebet, Sine, Merîwan, Dîwandere, Nûdşe, Kirmasî, Gilana Rojava (Gilanê xerb), Serpilzehav, Kamyaran, Kerend û Qesrşîrîn.

Di Xwenîşandana Viyenê De Kurdan Daxwaza Xistine Rojava Dosya Terorkirina Dr. Qasimlo û Hevalên Wî Kirin

Bi hinceta 17'emîn salvegera terora dijî Dr. Qasimlo û hevalên wî û her wiha xistine rojava

dosyeya vê terora nemirovane pêtir ji 1000 kes ji Kurdên rûniştîyê welatên Ewropayê, xwenîşandaneke li Viyena serbajarê Otrîşê pêk anîn. Di vê meşê de ku ji aliyê PDK Îranê û Yekîtiya Ciwanên Demokrat a Kurdistanê Îranê ve hatibû lidarxistin, Kurdên hemû parên Kurdistanê, hin rêxistinên Îranî weke "Ekseriyet" û nûnerên PDK û YNK jî amade bûn.

Pitir Pilîts dibêje Ehmêdinejad di trokirina Dr. Qasimlo de dest hebûye Parlemantarê endamê Partiya

Keskan ya Otrîşê, Pîtir Pilîts di hevpeyvînekê de ragihand ku wî belge û girovên rast û dirust di pişikdariya Serok Komarê niha yê Komara Îslamî li terora dijî Dr. Qasimlo ji dest de hene. Navhatî herwiha da zanîn serbarê wê ku dewleta Otrîşê haydarê gotûbêjên aştiyê di navbera Îran û PDK Îranê de bû, cihê heyrîmayiyê ye ku çawa û çima dewleta Otrîşê erkê parastina rêberên Kurd bi cih neaniye.

Dr. Ebdulrehman Qasimlo rêberê gelê Kurd û Sekreterê Giştî yê PDK Îranê, Ebdulah Qadîrî Azer nûnerê vê partiyê li derveyî welêt û Dr. Fazil Resûl, li 13.07.1989'an de li dema danûstandin ji bo çareserkirina pîrsa Kurd li Kurdistanê Îranê, ji aliyê nûner û diplomatên terorîst yê rejîma Îslamî ya Îranê ve hatin teror kirin.

Jin Di Yekemîn Ceribîna Hilbijartina Kuweytê De

Pistî şoreşa Fransayê û pesendkirina Qanûna Bingehîn û danezana gerdûnî ya mafê mirovan û

welatîbûnê di 26'ê Tebaxa sala 1789'an de, esla wekheviya navbera tev welatiyan hate pejirandin. Lê di şoreşa Franse de mafê welatîbûnê ji bo jin û jar û belengazan bi fermî nehate naskirin û tenê mafê dengdanê ji tevahiya mêran re bi fermî hate nasîn. Derheq mafê dengdanê ji bo jinan divêt em hetanî sala 1944'an ya Zayînî yanî aliye kêm 150 salan piştî şoreşa Fransayê çavniher bin heya mafê

wekhev yê jinan bi fermî tê naskirin û esla yek kes û yek deng û wekhevî di siyasetê de tê îlan kirin.

Derbarê rola jinan di xurtkirin û berbipêşdebirina demokrasiyê de, sedemên zaf yên çandî, civakî û siyasî di holê de ne ku renge hindek caran tevî hev natebahî hebin, sedemên wekî bajar akincîbûnê, zafbûn û jordecûna pileya zanîn û xwendewariyê, pêşketina demokrasiyê di yasa û di jiyana civakî de, pitirbûna "NGO"yan, hezkirin û biîsrarbûna jinan ji bo beşdarî di warên civakî û pejirandina serxwebûna hêdî hêdî ya jinan wekî welatiyeke azad û pêkhatina wekheviyê di navbera kargeh û karkirinê li derveyî malê û bi taybetî piştrastbûna jinan bi hêza xwe û jordecûna asta hişyariya siyasî a jinan û rola perwerdehî û bandorekê ku dikarin li ser evlad û hevjinên xwe de pêk bînin, ji sedemên erênî û bibandor yên cihgirkirina demokrasiyê di welat de ne.

Di hemû welatên cihanê de jin nîviya pêkhatiya nifûsê pêk tînin. Di Rojhilata Navîn bi giştî û nemaze di welatên Erebi de jin ji mafê qanûnî, hiqûqî û mirovî ên xwe bêpar in. Di wan welatan de rejîmên paşverû bi awayê hewce û jêhatî tevî yasa û rê û cihên navneteweyî mafê jinan jî barçav nagirin û rê nadin ku jin rola bingehîn ya xwe di gişt warên siyasî, civakî, çandî û hwd ... li civatên de bilîzin.

Li pey hatine rojeva projeya Rojhilata Navîn ya Mezin û basa demokratîzekirina van welatane bi awayê mîcîd ji aliye dewletên mezin yên cihanê ve, dewletên paşmayî û kevneperest bi xwe ketine û dixwazin bi pêkanîna hinek guhartinan xwe tevî vê pêvajoyê rê bixin. Bo mînak di nava du salên dawiyê de nêzik bi 12 hilbijartin di welatên girtî û paşverû yên Rojhilata Navîn de hatin lidarxistin.

Kuweyt yek ji wan welatan e ku mafê dengdana jinan û başdarî û çalakiya jinan di civakê de qedexekiribû û jinên vî welatê Erebi nedikarin post û berpirsiyariya hikûmetê û fermî li stû bigirin. Lê Parlemana Kuweytê bo cara yekemîn di dîroka xwe de di meha Maya sala 2005'an de, mafê dengdan û berbijarî di hilbijartinan da jinan. Li pey girtina vê qanûnê de, jinên Kuweytê di roja 4'ê Avrîla 2005'an de, di hilbijartina şaredariyê de deng dan.

Di roja 29.06.2006'an de, bo cara yekemîn di dîroka vî welatê de jinan karîna di

Çinûr Qadîrî



Roja 29.06.2006'an, jinên Kuweytê di halê rawestan ji bo dengdanê. Eva cara yekemîn e ku jin dikarin di hilbijartina Parlemana Kuweytê de xwe berbijar bikin û deng jî bidin.

hilbijartina civata qanûndana welatê Kuweytê, yanî Parlemanê beşdariyê bikin.

Xala balkêş ya hilbijartinên Parlemana Kuweytê a vê carê, xwe berendamkirina 28 jinan li rex nêzik 250 berbijarên mêr ji bo bidesveanîna 50 kursiyên Parlemana wî welatî bû. Berendamên wek **Rola Deştî** (Duktora ji Zanîngeha Hapkinza Amerîka), **Fatme El Ebdalî** (Duktora ji Navenda lêkolîna jîngehê), **Xalide El Xedar** (Duktora tenduristiya giştî) û **Nebîra El Necarî** û ... ji jinên herî xuya yên vê gerê ji hilbijartina Parlemana Kuweytê bûn. Piraniya jinên berendam ji xebatkarên warê mafê jinan di Kuweytê de ne.

Bînin ber çavê xwe, di welateke wekî Kuweytê de ku jin pareke barçav ji nifûsa vî welatî pêk tînin ji mafên xwe ên hiqûqî û siyasî hatibûn bêpar kirin. Di halekê de ku radeya dengderên jin ji mêran zafir bûn (195000 jin li hember 145000 mêran), ev pirse derdikeve holê ku çima jinan nekarîna heta kursiyeke Parlemanê jî bi dest bixin?!

Bêguman kultura zal ya mêr serdestiyê di civaka Kuweytê de û hinek sedemên çandî û deb û edetên kevneşop ku di civaka Kuweytê de bi awayekê rih û bingeh dakutane ku heya jinên Kuweytê ne amade bûn dengê xwe bidin jinan û bikarin di yekemîn ceribîna hilbijartinê de ku jin tê de beşdar in, serkevtinê bidest bixin. Herçiqas jinên Kuweytê di vê gava dîrokî de serkevtî nebûn, lê ji holê rakirina vê çandê û deb û edetan û nêrînan zal ên paşverû demeke zêdetir dixwaze.

Bi giştî em dikarin vê ceribîna hilbijartina Parlemana Kuweytê ku bo cara yekemîn di dîroka wî welatê de jinan jî mafê dengdanê hebû, gaweke erênî û pozetîv bihesibînin.

Di heman demê de divêt jinên Kuweytê bo ji nav birina van kosp û astengên pêşiya serkeftina xwe xebat û tekoşinê bidomînin û bi beşdariya çeleng ya xwe di tev warên civakê de roleke girîng bilîzin.

Jin Di Ramana Rêberê Nemir Dr. Qasimlo De

"Di gavekê da ku jin çavkaniyeke herî xwedî hêz in bo hunermendan heta berheman biafrinin, hîzr û bawerên kevin ên Xumênî meqamê jinan aniye xwarê û ev kirine rihberekî bê véc, rihberek ku tenê jêhatî koyletiyê ye û neçar e di malê da heps be, heta xizmetê bi mêran bike û dûr ji civata

mêran domê bide jîne."

"Jin her çiqas pêtir di kar û barên civakî û siyasî de beşdariyê bikin, civak pêşketîtir û her çiqas di tevgera siyasî ya neteweyekê de jin pêşverû bin, ev tevger pêşketîtir û dê şans û bextê serkevtinê pêtir hebe."



Serdemê Bav Serdestiyê

Amadekar: Hemîd Muxtarî

Xwendevanên hêja, her wek hûn dizanin me di hejmara berê ya weşana Agirî de baseke kurt li

ser serdemê dayîk serdestiyê pêşkêşî we kir û qîrar bû di vê hejmarê de em ji civaka dayîk serdestiyê vegehin bo civaka bav serdestiyê û sebebên wê ji we re bidin ber şîrove û dahûrandinê.

Her wek me di hejmara berê de jî bas kir, bi wan serkeftinên ku jinan di warên, malbatî, aborî, perwerdehî, civakî û siyasî de bidestve anîn, dewranek di jiyana mirovahiye de dest pê kir ku bi navê serdemê Jin Serdestiyê (Dayîk Şahî) bi nav û deng bû, lê tevî vê yekê ku jinan karî wan serkeftinên xwe bi hezaran salan di civaka destpêkî ya mirovahiye de biparêzin, bi hinek sebebên ku emê niha ji we re bînin ber bas, ev yeka nekarî heta heta bimîne û hêdî hêdî piştî dewranekê ji wekhevbûn di desthilatê de, serdemê bav serdestiyê (bav şahî) dest pê kir ku niha jî nîşaneyên wê bi awayekê tîn berçav.

Wîl Durant dibêje: "Dubendiya berxwedaniyê ku îro rojê di navbera jin û mîr de tê dîtin, di vê demê de gelek berçav nebû". Ev natebahiya pitir di rewşa jiyânê û xwezayê peyda bûye û di warê kûrî û zatî ve bi qasê hewce ne balkêş e. Jin di wê demê de di warê sebir û peydakirina rêya çareseriyê pirsgirêkan û dilêriyê tu ji mîr kêmtir nebûye û mîr weke alaveke cînsî (zayendî) ji jinê re nedinihêrî, belku canlibereke bihêz bûye ku kariye bi çendîn seetan bi encamdana karên dijwar û giran mijûl be û heta li dema pêwîst jî di rêya parastina zarokan û eşîra xwe de heta astê mirinê şer kiriye.

Lê piştî ku mîr bi her awayekê karî bibe xwediyê qawet û hinira zaf ya cendekî yan her ji destpêkê de xwediyê wê hinirê bû, karî bi mifah wergirtin ji xwe û bi bikaranîna heywanên barkêş, jinê rastî rewşeke cuda bike, bi awayekê ku bi xwe karî hêdî hêdî karên berheimanîne li stû bigirin û jin ku hemû kare bû, piştî di malê de ma û mijûlê kar û barên nava malê bû. Bi vî

awayî mîr bû cihgirê jinê û serokatiya malbatê kete destê wî û piştî demeke kurt, serdemê bav serdestiyê dest pê kir.

Ji destpêka vê dewranê jî jin xwediyê mafê wekhev tevî mîr bû û hetanî dikarî aboriya malbatê birêve bibe, lê hêdî hêdî bi xurtbûna pezdarî (xwedîkirina malatan) û cotkariyê, bihagiraniya mîr roj bi roj zêdetir bû û seba hinek erkên pîşeyî (senetî û hozanî) bo derveyî malê (yanî bo mêran), erkên nava malê yên



Wêne ji malpera chatrbaz.com hatiye wergirtin.

jinan kêmtir bûn û hêdî hêdî ji çarçoveya berheimanîne bi wî awayî ku li berê hebû hate derê û tenê kar û barên xizmetkirin û selîqeyî di nava malê de ji bo jinê bicî ma.

Wîl Durant vê yekê bi vî awayî şîrove dike: "Dema ku pişesazî û cotkarî ber bi pêşve çû û kemilî û berhemên zaf bi destve anî, mîrî karî hêdî hêdî desthilata xwe li ser jinê xurt bike." Bi pêşkeftina teknîka xwedîkirina heywanên kedi, çavkaniya nû ya dahatê kete destê mîrî de û bi vî awayî jiyana bihêztir bû û ewlehiyê zaf bi xwe ve dît. Hetanî cotkarî ku ji rêya sikur stûrên serdemê kevn ve weke kiriyareke bê biha dihate hesibandin, di encam de bala mîrî bi giştî ji bo aliyê xwe ve rakêşaye û desthilatdariya aborî ku dema xwe jinan di vê rêyê de bi destve anîbû, ji dest wê de derbixe. Dest bi dest kirina rêveberiya aborî ku heta vê demê jî aliyê jinê ve dihate encam dan, kete nava çarçoveya desthilata mîrî de, mafê dayîkê li hember mafê bavî de xwe êxsîr kir û rastî têkçûnê hat û malbata bav şahî ku mîrê mezin yê malbatê rêveberê wê bû, di civakê de

weke yekîniya aborî, yasayî, siyasî û sincî hate naskirin, piraniya Xwediyên vê demê ku weke jinê dihatne çêkirin, piştî weke mîrên xwedî rih û rîşe hatne çêkirin ku di rastî de nîşanderê bav û şêxên eşîrê bûn. Hatina serdemê bav şahiyê derbeyeke giran bo ji nav birina desthilata jinê tê hesibandin. Piştî wê demê ji bo zewicîne her çawa kole û xulam di nava bazarê de dikirin, bi wî awayî jin jî dikarî û li dema mirina mîr, jin jî weke milk û malê mîr bi mîrat didan.

Sîstema bav serdestiyê ku tevî xwedîtiyê û dest bi dest kirina wê weke mîrata mêrane bû û her ev yeka mafê mêran û serokatiya gerdûnî, olî û siyasî ya wî

zêdetir kiriye û yasayên wisa pêk aniyê ku desthilatdariya wî hetanî niha jî didome.

Wîl Durant dinivîse: "Di hemû ciheke erdê, bihagiraniya jiyana jinê ji mîrî kêmtir bûye û ger jinan keçek dibûn, ew rê û resma û cejna ku li dema jidayikbûna **kur** dihate girtin û birêve diçû, ji bo **keçan** tişteke wisa her tune bû".

Di serdemekê de ku jin pîroz bû, di vê dewranê de li

bal hinek eşîr qewm û gelan nemaze di dema ku jin di nava şûva xwe de bû, weke heyberek pîs û mirar dihate nihêrîn û heta rêya xwe şîştinê û paqijkirina xwe di nava avê de jî nedidanê.

Wîl Durant derheq pirsên zayendiya mêran di vê dewranê de dibêje: "Mîr azad û dest vekirî bû ku li derveyî malê de têkiliyên cînsî hebe, lê jin di sîstema bav serdestiyê diviya namûs û şerefa xwe heta dema zewicîne biparêze û piştî zewicîne jî diviya bi giştî bi mîrê xwe re emegdar bimîne û bi vî awayî ji bo rabûn û rûniştina her yek ji du cînsan (nêr-mê) çarçoveyakî sincî ji hev cuda pêk hat."

Wîl Durant di warê vê çarçove çêkirinê de dibêje: Di hemû dîrokê de em nikarin hetanî mînakekê li ser vê yekê peyda bikin ku civakê ji mîrî xwestibe ku heta dema zewicîne namûs û şerefa xwe biparêze û di hemû warekê de jin ketiye ber bê hurmetî kirinê û bê qîmet bûye. Dewranek ku heta niha jî li piraniya welatên Rojhilatî û bi taybet welatên Erebi û welatên weke Îranê de her berdewam e."

Nerazîbûn Li Hember Hebûna Mayînan û Navendên Leşkerî Li Serdeştê

Li gor agehiyên Rêxistina Mafê Mirovan li Kurdistanê, hefteya borî jineke Serdeştê bi navê **Sebrî Biryadî** bi sedema teqîna mayîne pîyeke xwe ji dest da. Navhatî hevjiya kedkareke belengaz û destkurt bi navê Ebabekr Mam Simayîlî ye. Gel li bajarê Serdeştê bi xurtî li hember hebûna navendên leşkerî li nêzik avahî û malan û ne paqijkirina qadên mayînan li vî



bajarî nerazî bûne. Raydar û organên rejîma Îslamî ya Îranê bo ji holê rakirina meydanên mayînan û dûrkirina navendên leşkerî ji cihê jiyana û akincibûna welatiyan tu gawe ne avêtine.

Hetanî niha jî bi dehan û sedan kes ji welatiyên Serdeştê û bajarên din dibin goriyên teqîn û telikên mayînan.

Albûma Cendekên Me

Evdile Koçer

evdilekocer@yahoo.com

Ê dî her tişt kifş û eşkere ye,
êdî her tişt bêminetî ye looo...
Şerên ku mîrên berê dikirin,
li dû me ma.
Şerên nû li ber devê deriyê

me ne.

Îro her tişt wekî ekranên
televîzyonê li ber çavê me ye.
Belkî haya we jê hebe, lê em dîsa jî
bi hev re bixwînin: "Zarokên ku li ser
sergoyekê nêzikî Bajaroka Încîrlîka
Edeneyê kaxez kom dikirin, li ser
sergo albûma wêneyan a leşkerekî
dîtin. Di albûma leşkerekî ku li herêma
leşkerî kiriye de, wêneyên endamên
PKK'ê yên înfazkirî cih digrin. Di
sergoyê de wêneyên bi xwîn ên
endamên PKK'ê ku di pevçûnan de
jiyana xwe ji dest dayînin kişandine û
xistine albûma xwe ya malbatê"
(çavkanî: **DÎHA**)

Ji me re albûmeke xweşik çêkirine:
Bi hovîtiya xwe ya nenaskirî ve, bi
faşîzaniya xwe ya çiriyayî ve, bi qewl
û peymanên xwe yên bêlomeyî ve, bi
planên xwe yên gerînekî ve, bi
neyartiya xwe ya barbarî û bêserûberî
ve, vê albûmê neqîşandine.

Bi keşala devê xwe yê genî ve, bi
xwîna xwe ya herimî ve, navê xwe û
yên heft bavên xwe jî li ser vê albûmê
danîne.

Xûşk û birayên me yên ku wekî
çiyayên me xweşik yên ku dixwazin
xewnên xwe li zozanên Kurdistanê
bivejînin, yên ku dixwazin ji bermalên
xwe re stareke henûnok ava bikin,
dikevin ber xezeba wan û wekî gûrên
hov dixin vê albûmê...

Bila êdî çiyayên me bi têra dilê xwe
bigirîn.

Zimanê me yê ku di kaniya Melayê
Cizirî de dibû eşqa dilberê, yê ku di
şîn û şahiyên me de mala rihê me yê
herî mezin û xemrevîn bû, ji ber ku
nehiştin biharek bi ser ve bê her
weşiya û ket vê albûmê...

Êdî em wek lalan in gidiño.

Çanda me ya ku di havînên
xalxalokî de di nav hêviyên şivanan re
bi stêrkan re hevaltî dikir ya ku li ber
dîwarên neyaran jî her nefel dida, di
bin nîrê wan de qurmiçî û ket vê
albûmê...

Êdî havînên me bêriya stêrkan
nakin.

Çîrokên me yên ku di nav awirên



diyên me de pala xwe her didan
mereqa me, yên ku bi qehremanên
xwe yî maqûl ve xwe di nav bexçeyên
şevîngehên me de ji nû ve vedigotin,
tevna wan xira kirin û xistin vê
albûmê...

Êdî meşteleyên rihê me her ku diçe
bêtir diçilmisin.

Stranên me yên ku ji hezkiriyên me
re dibûn ramûsanên herî gulgulî,
heyranok û payîzokên me yên ku
Mem û Zînê di şevûrojê de
digihandin hev, ji nav me dizînin û
xistin vê albûmê...

Êdî em li rastî Mem û Zînên kurdî
nayên.

Leyistikên me yên ku hîle û pîleyên
zarokatiya me dipîvandin, yên ku
şahidiya miziriyên ciwantiya me ya bê
eman dikirin, bi leyistikên xwe yên
hov ve pelîşandin û xistin vê
albûmê...

Êdî em ji hev re leyistikên neyarên
xwe ava dikin.

Gund û çiyayên me yên ku wekî
pirtûkên pîroz xwe di hembêza hev de
vedişartin, deşt û zozanên me yên ku
şervanan dikirin helbestvanê dilê xwe,
ji cigareya xwe re kirin pizotê agir û
xistin vê albûmê.

Yarî û tinazên me henek û
pêkenokên me yên ku bi awaza
tîqetiqên me ve her dem dibûn şeker û
çeqlatên feqîriya şevên me, rojekê
serê xwe dan haziran û xistin vê
albûmê.

Êdî em ji her demê bêtir feqîr û
belengaz in.

Êdî em wekî miriyên bê serî diçin û
tên.

Ji ber ku albûma hebûna me di
destê wan de ye.

RÊBER



H. Reşîdîyan- Oslo

Li geliyê xan bûye nalîn
Li Ormîyê de bûye kalîn

Li her derê bûye eyan
Dim dim şiyar kirin ewan

Ev çi nalîn û kalîne
Dar û bera dihelîne

Jin rûniştine pişt dera
Rûçikandin tûka sera

Kîzan hêlan ebrî û poşî
Di qîrînyan biperoşî

Bûkan hêlan cilên sipî
Negrêdan ewan kofî

Xelk hemû bûne peroş
Ber bûyerê bûne rîşpoş

Nalîn gehişte serê çiyân
Li nav mîrgan û kaniyan

Nûçe çûbû nav hevalan
Li ser çiya û zozanan

Ber bûyerê bûne bêdeng
Kul diçûn û bibûn bêreng

Neşên bigirên aşkere
Çunke biryara rêbere

Biryara rêber ew bû
Ji şehîdan girîyan nebû

Li batî girîyanê wan re
Berneden rêka wan re

Eve çibû hat serê me
Şehîd kirin rêberê me

Kanya avê me çik kirin
Bûyera berê dopat kirin

Doktor nav me de rakirin
Cihê wî nav gel vala kirin

Temenê xwe wî da ji dest
Ta gelê me bibe serbest

TÊGIHÊN FELSEFÎ

ADAR JIYAN

adarjiyan@my.net.com

Felsefe, pîvanga bikaranîna hizra mirov e. Her wiha pîvanga mêjera zanîna hizra mirov e jî. Çi têgih û


rêman dibe bila bibe, heta ku xwe nespêrin şîroveyeke hişmendî û li gorî raveyeke zaneyane û felsefî neyên navandin, tu car nikarin bigihîjin wateyeke xwe ya rastîn. Ji bo wê hewce ye ku hemû têgih bi wateya xwe re li hev bin.

Di axaftin û bilêvkirina rojane de, mirov gelek caran pêrgî peyv û têgihên ku ji wateya xwe bi dûr ketine -an hatine bidûrxistin- dibe. Îcar ev têgih jî bi hin rengdêrên awarte ji hev û din têne veqetandin. Bo nimûne; gava behsa "demokrasiyê" yê tê kirin hin kes bê hemdê xwe dibêjin "demokrasiya rastîn". Di vir de peyv û têgeh bêhemd an jî dûrî ramîna mirov têne bikaranîn û navandin. Gava ku mirov baş bifikire, tenê wateyeke "demokrasiyê" heye. Û di wateya wê jî "otokrasiyê" ye. Belê di wateya wê ne "demokrasiya ne rastîn e." Ango gava ku demokrasiya rastîn hebe, teqez dê ya ne rastîn (a sexte) jî hebe. Belê gava ku mirov ji hêla felsefî ve lê binihêre qet tiştekî wisa nîn e. Ji lewre demokrasiyê, xwediyê wateyeke misoger e. Û wateya wê ya rastîn jî tenê yek e. Yanî wateya demokrasiyê ya ne rastîn qet nîn e. Heke hebe jî ew ne wateya demokrasiyê ye.

Mirov dikare der barê wê yekê gelek mînakên şaş ên din jî bide: Wekî nimûne; "azadiya rastîn" û "azadiya ne rastîn", "bindestiya rastîn" û "bindestiya ne rastîn", "têkoşîna rastîn" û "têkoşîna ne rastîn", "şoreşa rastîn" û "şoreşa ne rastîn", "hevalê rastîn" û "hevalê ne rastîn", "dostê rastîn" û "dostê ne rastîn", "dijminê rastîn" û "dijminê ne rastîn" û hwd.

Hin têgih hene ku li gorî mêjer û pîvanga xwe têne ravekirin. Wekî mînak; "têkoşîneke xurt", "têkoşîneke qels"; "tevgerike xurt", "tevgerike qels"; "rêxistineke xurt", "rêxistineke qels", "artêşeke xurt", "artêşeke qels" û hwd... Belê ev watedayîn ji bo têgihên ku wateya wan a misoger hatiye dayîn, ne derbasbar e. Lewre, pîvanga û mêjera têgihên mîna "azadî", "demorasiyê", "bawerî", "şoreş", "sosyalîzm", "serxwebûn" û hwd. nîn e. Ew an bi wateya xwe ya misoger an jî bi di wateya xwe ya misoger têne zanîn watedarkirin. Yanî mirov bi hêsanî dikare bibêje, "tevger" "rêxistin" û "têkoşîn" eke "baş" an jî "ne baş" belê mirov nikare bibêje "azadî", "demokrasiyê", "bawerî", "şoreş" û "sosyalîzm" eke "baş" an jî "ne baş".

Hin kes dibêjin: "Em ji bo azadiyeke rastîn têdikoşin." Gelo qey "azadiyeke ne



rastîn" an anga "azadiyeke sexte" jî heye?

Na. Lewre, têgiha "azadî" yê dijberê têgiha "bindestî" yê ye û pê watedar dibe. Bi vegotîneke din di jiyana kes an jî civakê de an azadî heye an jî bindestî. Girêdayê wê yekê mirovên wê civakê an azad an jî bindest in. Ne pêkan e ku him azad û him bindest bin. An jî hinekî azad û hinekî bindest bin. Belê pêkan e ku hin caran dilxweş û aram û hin caran jî dijlar û xemgîn bin. Lewre "dilxweşî" û "xemgînî" du têgihên dijber, belê her wiha guherbar in jî. Û ew li gorî mêjera xwe diguherin. Lewre pêkan e ku mirov di heman rojê de him dilxweş û him jî xemgîn bibe. Belê de ne pêkan e ku di heman gavê him azad û him bindest bin. Mirovek, an azad e an jî bindest e. Bi heman awayî pergala rêveberiya civakê jî an demokratîk e an jî ne demokratîk e. Îcar mirov ji bo pergale nikare bibêje "hinekî demokratîk" an jî "zêde demokratîk" e.

Bi vegotîneke vekirîtir, mirov bi hêsanî dikare têgihên ku wateya wan a rastîn bi awayekî misoger hatiye dayîn, rave û şîrove bike. Wekî mînak, mirov nikare ji bo "av" e bibêje ava rastîn û "ava ne rastîn" an "kevîrê rastîn" û "kevîrê ne rastîn". Lewre tiştek an "av" e an jî "ne av" e. Ji bok kevîr jî heman tişt derbas dibe; "an kevîr" e an jî "ne kevîr" e. Belê mirov nikare ji bo "başî", "nebaşî", "xweşî", "nexweşî", "rastî" û "ne rastî" yê heman tiştî bibêje. Çimkî pejirandina wate û şîroveya van têgihan li gorî kesan digihere. Tiştekî ku ji bo hin kesan baş be, dibe ku ji bo hin kesên din ne baş be. An jî tiştekî ku bi hin kesan xweşik û bedew be; dibe ku bi hin kesên din zist û kereh (ne xweşik) be. Belê têgihên ku wateya wan a rastîn û misoger ji hêla her kesî ve hatibe pejirandin û li gorî "rêbaza mantika formel" hatibe dayîn, nayên nîqaşkirin.

Çi têgih û rêman dibe bila bibe, heke ku wateya wan î rastîn bi awayekî felsefî û zaneyane neyê danîn û ravekirin, dê pêwendîya navbera takekes û civakê biwêqe. Û girêdayî wê yekê jî dê ragihandin û têgihîştina navbera mirovan her gav kûd bime û bilicime.

Kaniya Helbestan

Letîf Epozdemir

PÊŞEWAZÎ

bende û dîlê zeman im
bijang wek tîr ebrû kewan
kezya berde ku bi reqsin
bisk û gulî bêm himatê.

Şûr bi dest diwar bi hestî
Bihara min neke zivistan
Dilovanî bêm mirin e
Xwe dîr neke jî sebatê

Her carek ku sing diheje
Zelzele dikeve nav dil
Bi dîdarek sermest dibim
Derkeve nava civatê.

Ji hezaran dert re heye
Kûl û şehînek bo sebeb
Kirasê agir li me ye
Lewra dil nake tebatê.

Agirê zerdeşt bi nav im
Dişewite cerg û dil
Şev û rojan xew betal e
Naweste qet jî lebatê..

Meke gazin ey dîlbera gerdên
bi xal
Fesal tune nîne mecal
Wê bihar bêm vebûn kulfîl
Herkes kûbar bi felatê.

BÎRANÎN

ji bîr nabe ew rewşa kûbar
bê miraz man e îro cî û war
sest qeda li vê qedera dest bi
dar
ku wiha me di hêla bêm dost û
yar.

Digel hev wek kela bûn
Ne hilwêşin bi derban
Bi dû hev ketin, çûn
Ken ma li ser lîvê wan.

Ey felek

te bi çavên birçî
jiyanê kirîyê mîrat
mîrin her para me ma
tarî bûne zilomat
bes êdî me navê
şîn û giryanê
vayê roja me hilat
me hezaran Nûredîn hene
hemû Yawûz dil polad

"ŞÎROVEYA DÎWANA MELAYÊ CIZÎRÎ" DERKET

Pişti demeke dirêj dîwana helbestvanê navdar yê Kurd, **Melayê Cizîrî** bi şîroveya Kurmancî ji aliyê Enistîtuya Kurdî ya Stenbolê hate çap

ji naveroka wan berheman fêma bike û çêjekê ji wan bigire.

Ji bo dagirtina vê valahiyê gelek kesan berhemên wêjekarên klasîk

û weşandin.

Wêjeya klasîk a kurdî di nav kelepura zimane kurdî de cihekî taybet digire. Di nav wêjeya klasîk de jî çend nav hene ku berî her kesî têne bîra mirov. Ew kes xwediyê şahkar û berhemên bêhempa ne. Meleya Cizîrî yek ji wan nava e. Lê mixabin nîfşên nû nikarin sûdê ji wan berhemên klasîk wergirin, ji ber ku di berhemên klasîk de zimanekî aloz û tijî peyvên erebî û farisî hatiye bikaranîn. Kesên ku van berheman bixwînin divê hem bi zimanê erebî û farisî bizanin, hem jî haya wan ji raman û felsefeyên wê demê hebe. Lê ji bilî kesên pîşpor kes nikare



şîrove kirine. Dîwana Ehmedê Xanî, berhema Ehmedê Xanî ya bi nav û deng **Mem û Zîn** ji hêla gelek kesan ve hatine şîrovekirin. Her wiha Dîwana Melayê Cizîrî jî bi zimanên cur bi cur hatibû şîrovekirin. Di kurdî de jî Hejar Mukriyanî şîroveya wê bi zaravayê soranî kiribû, lê bi zaravayê kurmançî şîroveya wê

nehatibû kirin. Seyda **Celalettîn Yoyler** ev valahî dagirt û hemû helbestên di dîwana Melayê Cizîrî de bi kurmançî şîrove kirin û di nav pirtûkekê de pêşkêşî gelê xwe kirin. Ev pirtûk ji nav Weşanên Enistîtuya Kurdî ya Stenbolê derket. Pirtûk ji 1087 rûpelan pêk tê, li ser kaxiza spî hatiye çapkirin û cilda wê jî germîn e.

Di destpêka pirtûkê de pêşî li ser jînenîgariya Melayê Cizîrî agahî hatine dayîn, mijara jidayikbûna Melayê Cizîrî li gorî hesabê ebcêdê



Nivîskarê "ŞÎROVEYA DÎWANA MELAYÊ CIZÎRÎ", Celalettîn Yoyler

hatiye ronîkirin. Wisa xuya dike ku dê hezkiriyên wêjeya kurdî karibin ji helbestên Melayê Cizîrî bi hêsanî fêma bikin û ji wan tam û çêjekê wergirin.

Em tevî pîrozbahiyên germ yê xebatkarê weşana **Agirî** ji Nivîskar **Celalettîn Yoyler** re bona encamdana vî karê mezin û pîroz, hêviya serkevtinê ji vî wêjevanê kurd û zehmetkêş bi hêvî dixwazin.

Jêder: Enistîtuya Kurdî ya Stenbolê

Bersiva Sudoku a Hejmara 42'an

9	2	4	7	3	5	6	8	1
1	8	6	9	2	4	3	7	5
3	7	5	8	6	1	4	9	2
8	1	3	6	4	9	5	2	7
5	9	7	2	8	3	1	6	4
4	6	2	5	1	7	8	3	9
6	5	1	3	7	2	9	4	8
7	3	9	4	5	8	2	1	6
2	4	8	1	9	6	7	5	3

Ji bo bersîvdana Xaçepirsa hejmaran (Sudoku)yê ya nû, tenê van sê xalên jêrîn berçav bigirin:

1. Hejmarên 1-9'ê di xet(xêz) û stûna serjêr tenê carekê dubare dibe.
2. Hejmarên 1-9'ê di xet(xêz) û stûna çepast de tenê carekê dubare dibe.
3. Hejmarên 1-9'ê di nava çargoşeke 3×3 de tenê carekê dubare dibe.

Xaçepirsa Hejmaran (Sudoku)

		9	6	1	4	2		8
	6							3
7		4	3		2	9	1	
6		5	4				8	2
8				6	1		9	
4		7		2				1
1		8				4	6	9
		2	1	4		8	3	7
3	4		9		7	1	2	

Civîna Parîsê Ya Welatên 5 + 1, Dosya Etomî Ya Îranê Bo Konseya Ewlekariyê Vegerand

Wezîrên Derve yê 5 welatên endamên dayîm ên Konseya

Ewlekariyê û Almanyayê di necama civîna xwe ya Parîsê, di roja 12.07.2006'an de, biryar girtin dosya Etomî ya Îranê dubare ji Konseya Ewlekariya Rêxistina Neteweyên Yekbûyî re bihê vegeandin.

Ev biryare ji ber vê çendê bû ku Îranê bersîveke eşkere û zelal neda welatên han û careke din west û derfeta bersivdayîna derheq pêşniyarên hayder yê welatên 5+1 heya nîva vê mehê paş de xist.

Fîlîp Dost Bilazî, Wezîrê Karê Derve yê Fransayê û berdevkê civîna Parîsê eyan kir, heke Îran bersîveke neyînî bide civaka navneteweyî, ew dê pêşniyarbiryarekê di Konseya Ewlekariyê de binin ber bas ku ceza û dorpêçkirinên aborî dijî dewleta Îslamî ya Îranê werin meşandin.

Komara Îslamî dixwaze bi vê cure dîplomasiyê tenê demê bikire û bîkujê, hetanî bikare bi qasê hewce Uranîyûmê bi dest bixê û çêkên Etomî çê bike. Ev gava Îranê gef û xetereke mezin bo ser tenahî û aştiya cîhanê û herêmê ye. Ev rejîmê dixwaze civaka navneteweyî bixapîne.



Kongreya Çapemeniyê ya welatên 5+1 li Parîsê piştî bi dawî hatin civînê

Daxuyaniyek Ji Hunermend Şivan Perwer

Ji bo gelek tişt bi xeletî neyên fêhmîkirin, ez mecbûr im vê daxuyaniyê agahdarî dost û guhdaran bikim.

Bi hunermend Gulistan re ji nêz a dîr ve danûstandin û têkiliyê min a şexsî û hunerî nema ye û tune ye.

Zêdeyî 8 salan e em ji hev cida ne û hatine berdan. Ji ber vê yekê ye û hewce nake ku di warê jiyana taybetî de yan ji bo xebat û xizmeta hunerî destur û daxwazî ji şexsê min bête xwestin.

Hunermend Gulistan di jiyana xwe ya taybetî de azad û di danûstandin û têkiliyên xwe de bi biryar e.

Ez hêvîdar im ku dost, heval û guhdarên min li ser vê



mijarê serwest û agahdar bin.

Şivan Perwer bi bahweriya gel û welat, bi hunera xwe herdem di xizmeta we de ye.

Rêz û aşî,
Şivan Perwer

Zanist û Teknolojî

“Adobe” Ew Kunên Ku Di “PDF Rader” De Heye Pero Dike

Hamid Durûdî

Du kunên gelek bizirar ku hetanî niha di “Adobe Acrobat” û “Adobe Reader”ê de bûn, hatine peydakirin û ji aliyê “Adobe”ê ku ev pirogeremane çê kirine, ji wan re çareserî hate peyda kirin. Lewra “Adobe” di peyamekê de nivîsandiye ku bikarînerên her du sisteman yanî “Windows” û “Mac”ê bi sedema bikaranîna ev du pirogeremane, rastî pirsgrîkan hatine.

Rewşa herî xirab ya wan tûşbûnane demekê ye ku mirov rûpeleke “PDF”ê çê dike an ji bo vekirina wê hewcehî bi “Adobe Reader”ê hebe. Çûnkî di wan demane de hinek rawestan pêk tê û li wir de ji ye ku kodeke bi zîyan bi awayê “buffert”ê çê dibe.

Divêt eva ji were gotin ku ev kunane di weşanên “6.04” û “6.05”ê de hene, lewra çêtir eva ye ev kesên ku weşanên 6.00 hetanî 6.04’ê bikar tînin, divêt hindî zû wan programan nû bikin, nexwe dikarin di malpera “Adobe”ê de weşanên nû dabigrin û di kompyoterê yan CD û hwd cih bikin.

“Microsoft” Tê Kurdistanê

Hikûmeta Herêma Kurdistanê ji bo pêşketina navend û dezgehên Kurdistanê herdem di hewl û cehdê de ye û vê dawiyê hevhatinek tevî şirketa “Microsoft”ê girê da. Di vê derheqê de Azad Geylanî, Ravêjkarê Serok Wezîrê Kurdistanê bo kar û barê peywendî û teknolojiyê got: “Proje pêk hatiye ji avakirina navendeke teknolojiyê di warê “Ict”yê ji aliyê Hikûmeta Kurdistanê û bi alîkariya şirketa “Microsoft”ê li ser asta navendên giştî yê perwerde û fêrkirinê û beşa taybetî tevî piştgirîkirina zimanê Kurdî di



berhemên “Microsoft”ê de.” Hêjayî gotinê ye ku şirketa “Microsoft”ê yek ji kompaniyên mezin yê cîhanê di warê Kompyoterê de ye.

Rêxistina Mafê Mirovan Li Kurdistanê:

Divêt Hukmê Bêparkirina Xwendekaran Betal Bibe

Ji bo kom û saziyên ewlekarî û dadê di zanîngehan de

Di heyamê wan çend rojên dawiyê de hejmarek ji çalakvanên xwendekar yê Kurd di zanîngehên Kurdistanê de ji domandina xwendinê hatine bêpar kirin yan tevî ceza û zext û givaşê ve berbirû bûne. Di encama destbiser kirina xwendekarek Kurd bi navê Yasir Gulî, du xwendekarên Kurd bi navê Aso Salih û Esed Baqirî her yek bi sal û nîvekê bêparî ji domandina xwendinê û çend xwendekarên din jî bi terzên din hatin mehkûm kirin.

Rêxistina Berevanî ji Mafê Mirovan li Kurdistanê tevî eyankirina xemgîni û nerazîbûna xwe ji van kiryar û hûkmene ji aliyê saziyên ewlekarî û dadê di cihên rewşenbîrî û zanîngehan de, gef û zextên li ser xwendekaran û bêparkirina wan ji domandina xwendinê, pêşgîrî ji çalakiyên çandî û medenî bi bêparkirina wan ji mafên welatîbûnê û dijî bend û yasayên navneteweyî yê mafê mirovan dide zanîn. Ev rêxistine xwazayê vekirin û hilgirtina van biryar û hukmên li ser bêparkirin ji xwendin û kosp û asteng li pêşiya çalakiyên medenî a xwendekarên Kurd e.